



Savjeti i opomene (Medina)

Hatib: dr. Ali ibn Abdurrahman el-Hujejfi

10. rebiul-evvel 1446. po Hidžri / 13. septembar 2024.

Hvala Allahu, Koji je sve stvorio i odredio mu mjeru i Koji je sve obuhvatio milošću i znanjem, "On je zaista blag i prašta grijeha" (Fatir, 41). Hvalim svog Gospodara i zahvaljujem Mu na vidljivim i skrivenim blagodatima, onima koje znamo i onima koje ne znamo. Svjedočim da nema boga osim Allaha, jedinog, Koji nema sudruga, Koji je uvijek uzvišen Svojim svojstvima i lijepim imenima. Svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, koga je Allah poslao kao milost svjetovima, kao donositelja radosnih vijesti i opomene, i onoga koji poziva Allahu, s Njegovim dopuštenjem, i svjetiljku koja sija. Allahu, blagoslovi i podari mir i blagoslov svom robu i poslaniku Muhammedu, njegovoj porodici i njegovim ashabima.

Bojte se Allaha, tražite Njegovo zadovoljstvo i izbjegavajte Njegove zabrane, On će vam upisati Svoje zadovoljstvo i uzdići vas na visoke stepene u Svojim džennetima. Uzvišeni Allah kaže: "Onoga koji pred Gospodara svoga kao nevjernik izađe čeka Džehennem, u njemu neće ni umrijeti ni živjeti; a one koji pred Njega izađu kao vjernici, a koji su dobra djela činili – njih sve čekaju visoki stepeni, edenski vrtovi kroz koje rijeke teku, u njima će oni vječno ostati, i to će biti nagrada za one koji se budu od grijeha očistili. (Taha, 74–76)

O ljudi! Uzvišeni Allah kaže: "O sinovi Ademovi, kad vam između vas samih budu dolazili poslanici koji će vam propise Moje objašnjavati – onda se oni koji se budu Allaha bojali i dobra djela činili neće ničega bojati niti će bilo za čim tugovati." (El-A'raf, 35)

O sinovi Ademovi! Allah vas je stvorio za važan zadatak, kojeg su se nebesa i Zemlja odrekla, bojeći se da ga ne ispune i da ne budu kažnjeni, ili da ga ne izvrše u





potpunosti pa da budu ukoreni, i da ih zadesi Allahov obračun i kazna. Zaista, taj važan zadatak je obožavanje Allaha, Uzvišenog, uređenjem i izgradnjom zemlje prema Allahovom zakonu, i izbjegavanjem nepravde i svega što je zabranjeno. Uzvišeni Allah kaže: "Ko čini dobro, u svoju korist čini, a ko radi zlo, na svoju štetu radi. A Gospodar tvoj nije nepravedan prema robovima Svojim." (Fussilet, 46)

O sine Ademov, razmisli o početku svog stvaranja i njegovom kraju, i o stanjima između početka i kraja, koja se stalno mijenjaju. Uzvišeni Allah kaže: "Mi čovjeka stvaramo da se trudi." (El-Beled, 4) U tumačenju ovog ajeta komentatori Kur'ana kažu: "Allah je stvorio čovjeka da se suočava s teškoćama i izazovima ovog i onog svijeta, a zatim će nagradu dobiti oni koji su strpljivi i bogobožni, a kaznu oni koji se povode za zabranjenim strastima i željama." Uzvišeni Allah kaže: "A oni koji su zlo radili odavali su se onome u čemu su uživali, i grešnici su postali." (Hud, 117)

O ljudi! Dovoljan nam je Allah i divan je On zaštitnik! To su riječi koje je Poslanik, sallallahu alejhi ve sellem, izgovarao u teškim trenucima, nevoljama i nedaćama, i koje je preporučivao svojim ashabima. Ibrahim, alejhis-selam, izgovorio je ove riječi kada je bio bačen u vatru.

Allahu ekber! Koliko su velike stvari koje će čovjek doživjeti u životu na ovom i na onom svijetu! Ebu Zerr, radijallahu anhu, prenosi da je Poslanik, sallallahu alejhi ve sellem, rekao: "Zaista vidim ono što vi ne vidite, i čujem ono što vi ne čujete. Nebo je zaškrípalo i ima pravo da zaškrípi" – tj. od težine tereta – "nema mjesta na njemu širine četiri prsta a da nema meleka koji je spustio svoje čelo na sedždu Allahu. Tako mi Allaha, da znate ono što ja znam, malo biste se smijali, a mnogo plakali, ne biste uživali sa svojim ženama u posteljama, i izašli biste na visoka mjesta moleći Allaha. Volio bih da sam drvo koje će biti posječeno." (Tirmizi)

Nakon života na ovom svijetu slijedi ispitivanje u kaburu, za svakoga ponaosob. Enes, radijallahu anhu, prenosi da je Poslanik, sallallahu alejhi ve sellem, rekao: "Kada umrli bude spušten u kabur i njegovi prijatelji i porodica se udalje, on čuje topot njihovih koraka. Tada mu dođu dva meleka, posjednu ga i kažu: 'Šta si govorio o ovom čovjeku?' – misleći na Muhammeda, sallallahu alejhi ve sellem. Vjernik će reći:





‘Svjedočim da je on Allahov rob i Njegov poslanik.’ Reći će mu se: ‘Pogledaj svoje mjesto u Džehennemu, Allah ti ga je zamijenio mjestom u Džennetu.’ I vidjet će oba mjesta. A nevjernik i licemjer reći će: ‘Ne znam, govorio sam ono što su ljudi govorili.’ Reći će mu se: ‘Nisi znao i nisi slijedio.’ Zatim će željeznim čekićem biti udaren toliko snažno da će ispustiti krik koji će čuti svi osim ljudi i džina.” (Buhari i Muslim)

One koji vjeruju Allah učvršćuje postojanom riječju, a u zabludi ostavlja nevjernike i licemjere, i sve diplome ovog svijeta neće im koristiti. Zatim će Uzvišeni Allah nastaviti ispitivanje poslanika, alejhimus-selam: “Jeste li prenijeli svojim narodima?”, od Nuha, alejhis-selam, do posljednjeg poslanika, predvodnika svih ljudi, Muhammeda, sallallahu alejhi ve sellem.

Uzvišeni Allah kaže: “A šta će, tek, biti kada dovedemo svjedoka iz svakoga naroda, a tebe dovedemo kao svjedoka protiv ovih? Tog dana jedva bi dočekali oni koji nisu vjerovali i koji su se protiv Poslanika dizali da je nad njima zemlja poravnana; a od Allaha neće moći ni jednu riječ sakriti.” (En-Nisa, 41–42)

“... i zaustavite ih, oni će biti pitani: “Šta vam je, zašto jedni drugima ne pomognete?” (Es-Saffat, 24–25)

“I sigurno ćemo pitati one kojima smo poslanike slali, a pitat ćemo, doista, i poslanike, i izložiti ćemo im, pouzdano, sve što o njima znamo, jer Mi nismo odsutni bili.” (El-A’raf, 6–7)

Zatim će Allah pitati svakog čovjeka o njemu samom. Ebu Berza el-Eslemi, radijallahu anhu, prenosi da je Poslanik, sallallahu alejhi ve sellem, rekao: “Na Sudnjem danu čovjek se neće pomaknuti dok ne bude upitan za četvero: za život – kako ga je proveo, za znanje – šta je s njim uradio, za imetak – kako ga je stekao i na šta ga je potrošio, i o svom tijelu – kako ga je koristio.” (Tirmizi, hasen-sahih)

Obračun je težak, a Allah je pravedan sudija i Njemu ništa nije skriveno i On zna šta je u srcima. Na Sudnjem danu čovjek se neće pomaknuti sa svog mjesta dok ne bude upitan za četvero: za život – kako ga je proveo, dan za danom, noć za noći. Ako





svom Gospodaru odgovori iskreno i provede svoj život u pokornosti, bit će među uspješnim. Allah kaže: "Allah će reći: 'Ovo je Dan u kome će iskrenima od koristi iskrenost njihova biti; njima će džennetske bašče, kroz koje rijeke teku, pripasti, vječno i zauvijek će u njima ostati. Allah će zadovoljan njima biti, a i oni Njime. To će veliki uspjeh biti!'" (El-Maida, 119)

Čovjek će biti pitan i za svoj imetak – kako ga je stekao i na šta ga je potrošio. Ovo je težak upit, jer se tiče načina zarade imetka i njegovog trošenja. Halal imetak vodi dobrog čovjeka do najviših džennetskih stepeni, dok haram imetak donosi nesreću vlasniku i njegovim nasljednicima. Ensarijka Havla, radijallahu anha, prenosi da je Poslanik, sallallahu alejhi ve sellem, rekao: "Zaista će neki ljudi nepravedno raspolagati Allahovim imetkom, pa će za njih biti vatra na Sudnjem danu." (Buhari)

Kolika je odgovornost za imetak i koliko je zla i pokvarenosti u njemu za one koji ga troše na strasti i uskraćuju ga onima koji ga zaslužuju!

Čovjek će biti pitan i za svoje znanje – šta je s njim uradio. Postupati u skladu sa znanjem podrazumijeva podučavanje onih kojima je to potrebno, navraćanje na dobro i odvrćanje od zla. Najveća dobrota ogleda se u usmjeravanju čovjeka ka dobru i odvrćanju od zla.

Čovjek će biti pitan i za svoju mladost – kako ju je proveo. Ko se pokaje i popravi prije nego što odgovori svom Gospodaru, Allah će prihvatiti njegovo pokajanje, obasuti ga Svojom milošću i uvesti ga u Džennet. Ko slaže Allahu u odgovoru, Allah će ga razotkriti, a njegovi udovi svjedočit će protiv njega. Uzvišeni Allah kaže: "A na Dan kad Allahovi neprijatelji u Vatru budu potjerani – oni prvi bit će zadržani, da bi ih sustigli ostali – i kad dođu do nje, uši njihove, i oči njihove, i kože njihove svjedočit će protiv njih o onome što su radili." (Fussilet, 19–20)

A onoga ko slaže Allahu u odgovoru On će suočiti s onim što je učinio u ove četiri situacije, a zatim će biti bačen u Vatru.

Uzvišeni kaže: "Toga dana čovjek će o onome što je pripremio, a što propustio obaviješten biti." (El-Kijama, 13)





“O čovječe, zašto da te obmanjuje to što je Gospodar tvoj plemenit?”

“Ti ćeš, o čovječe koji se mnogo trudiš, trud svoj pred Gospodarom svojim naći: onaj kome bude knjiga njegova u desnu ruku njegovu data lahko će račun položiti i svojima će se radostan vratiti; a onaj kome bude knjiga njegova iza leđa njegovih data propast će prizivati i u ognju će gorjeti, jer je sa čeljadi svojom radostan bio.” (El-Inšikak, 6–13)

Bojte se Allaha onako kako Ga se treba bojati, i čvrsto se držite islama. Onaj ko se drži bogobožnosti, postići će dobro, i spasit će se od zla i propasti. Allah kaže: “Allah je vjernike milošću Svojom obasuo kad im je jednog između njih kao poslanika poslao, da im riječi Njegove kazuje, da ih očisti i da ih Knjizi i mudrosti nauči, jer su prije bili u očitoj zabludi.” (Ali Imran, 164)

Allah je poslao Muhammeda, sallallahu alejhi ve sellem, kao milost svjetovima. Nema dobra koje musliman može postići na ovom i budućem svijetu a da ga Allah nije omogućio preko njega. Poslanikovo, sallallahu alejhi ve sellem, pravo dolazi odmah nakon Allahovog prava.

Allah kaže: “Vjerovjesnik treba biti preči vjernicima nego oni sami sebi, a žene njegove su – kao majke njihove.” (El-Ahzab, 6)

“O vjernici, odazovite se Allahu i Poslaniku kad od vas zatraži da činite ono što će vam život osigurati; i neka znate da se Allah upliće između čovjeka i srca njegova, i da ćete se svi pred Njim sakupiti.” (El-Enfal, 24)

Poslanikovo pravo, sallallahu alejhi ve sellem, jeste da ga volimo, da mu dajemo prednost nad svime, da izvršavamo ono što je naredio, a klonimo se onoga što je zabranio, da vjerujemo u ono o čemu nas je obavijestio i da Allaha obožavamo onako kako nas je on uputio u svom šerijatu. Poslanik, neka su Allahovi blagoslovi i mir na njega, rekao je: “Niko od vas neće vjerovati dok mu ne budem draži od njegovog oca, njegovog djeteta i svih ljudi.” (Buhari i Muslim)





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA." (PREPOROD)

HUTBE 

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

